



Minggu, 11 Juni 2023
Ogen : 1 Korinti 1:10



Ersada Ukurndu



Ibas sada kegiatan natal ibahan me PJJ si jadi panitia. Teptep tahun PJJ pegancihen jadi panitia. Kerina PJJ rusaha erbahan natal e alu sada perayaan si mejilena. Tampil beda ras sidebanna. Turah kinihagan adi ipujiken kalak PJJ e i bas ngelakoken kepanitian e. Jadi me perbanding-bandingan sada panitia ras panitia sidebanna, seh maka kerina rusaha tupung PJJna jadi panitia ncidahken kesuksesen si lebih ras sidebanna. Enda me sada contoh maka kiniersadan jadi sada si sulit i bas jaman enda. Keeogisen, ngukurken diri sendiri reh buena i ja pa pe. Tengah-tengah jabu pe, mekatep kel bapa senang ras kesibukenna, nande senang ras kegiatenna, anak-anak pe bage. Kerina sibuk ras dirina sekalak-sekalak. Tading i bas sada ingan tapi la ersada (*satu tapi tidak menyatu*). Biak sibagenda enggo melala engkuasai kegeluhen; perpecahen entah erbana-bana pe jadi i bassa.

Bas gelar Tuhan Jesus, Paulus mindo man perpulungen Korinti segelah, ersada kata, ersada ukur dengen ersada sura-sura. Tujunna segelah la terjadi perpecahen. Perpecahen e erbahanca kita mesunah i gaur kalak sideban, la terjeng si e erbahanca kita mesunah pe kote. I tengah-tengah gerejanta pe bangunlah kiniersadan si paguh, sabap kiniersadan enda me sierbahanca la lit si metahat. Tentuna i bas bagun kiniersadan lit kiniteruken ukur, janah ngit erkorban sada ras sidebanna. UEM e me sada organisasi gereja si mabai kiniersadan i bas pekena-kena doni enda. Sada soranta guna kiniulin doni, pekena-kena doni sabap doni enda inganta tading, la banci lang kita ersada guna ngerawat dengen pekena-kenasa. Wari enda siperingeti wari jadina UEM, ipersingeti pe ngeluh i bas kinersadan aminna pe melala erbagena.